

敬

事

草

敬事草卷十四目錄

再催三省考官揭帖

三催考官揭帖

李侍郎兼翰林銜揭帖

四催考官揭帖

請點河南巡撫揭帖

辨湯御史本并乞休疏

乞休再疏

請釋建繫揭帖

敬事堂 卷十四目錄

乞休三疏

乞休四疏

乞休五疏

辨郭侍郎疏

停刑揭帖

乞休七疏

辨妖書并乞歸疏

聖諭嚴捕妖犯回奏揭帖

請宣諭 皇太子揭帖

命作諭 皇太子文弁諭局郎等文進呈揭

帖

擬諭二道

催請諭 皇太子揭帖

再票錢夢臯本揭帖

看詳皦生光詩稿揭帖

親諭皇太子傳示到閣奉慰揭帖

福王徵納遣官揭帖

請寬李家宰等差錯揭帖

請寬討賊引咎自陳疏

請趙司徒署吏部揭帖

請可太宰者揭帖

請設楚宗正揭帖

請寬周嘉慶妻孥揭帖

發沈令譽事者勿與問揭帖

敬事草卷十四

柱國少傅兼太子太傅吏部尚書中極殿大學士臣沈一貫

再催三省考官揭帖

三臣題竊惟浙江江西湖廣三省考官該禮部
上請且催請五次即臣等亦再揭以懇矣未蒙
發下中外皆生疑慮今日應天陝西考官俱蒙
點用發票仰窺 聖心原無留滯之意望乞一
視同仁早賜點發如或該部推舉有未當 聖
心處亦乞明示或速令改推或於原推中隨

聖明酌用庶不至妨誤大典也臣等敢不虔請

萬曆三十一年
七月初一日上

三催考官揭帖

三臣題臣等竊惟浙江江西湖廣三省考官屢
請未命輦轂之下人人生疑彼遠處聞之妄猜
妄講又當何如恐致謠言滋興非所以尊朝廷
一衆志也儻皇上以科臣員少不欲遠差則
明諭改差部臣亦無不可若聖意別有所為
亦乞早傳使臣下奉行緣係日期緊急恐誤賓
興大典輒復瀆奏惟皇上俯亮伏候勅旨

七月初
五日上

李侍郎兼翰林銜揭帖

查得萬曆三十年十二月內該禮部尚書馮琦
乞點用部職一本奉 聖旨覽卿奏知道了左
侍郎李廷機着吏部上緊行文催任右侍郎員
缺候旨行欽此照得李廷機係右侍郎奉 旨
為左侍郎吏部已欽遵行文催到今照禮部堂
上官舊規兼翰林職銜以便供講筵纂修等事
未經題給係內閣職掌合將李廷機以禮部左
侍郎兼翰林院侍讀學士乞 勅吏部查照施

行七月初七

日上奉

聖旨是吏部知道

四催考官揭帖

三臣題竊照浙江江西湖廣三省并近題河南
考官未蒙俞命 聖意精深必有所在但臣下
愚昧何能仰測惟乞明示以便題請或仍賜點
發允出萬幸若事可少緩臣等敢不靜聽但賓
興大典日迫一日恐奉差諸臣竭蹶難前又恐
人心不古浪傳亂揣以致疑惑 聖朝煽動愚
俗皆於政體大有妨礙犬馬忠赤實深憂惶安
敢避煩瀆之愆謹題請 旨

七月初八日

請點河南巡撫揭帖

三臣題蒙發兵部一本為中土盜賊可虞得人
防患甚亟等事臣等恭擬票上外輒附一言照
得河南巡撫缺至一年有餘吏部憂其地方無
主紀綱廢墜而屢以為請戶部憂其逋欠太多
乏人催徵而特以為請今兵部又憂其盜賊竊
發滋蔓難圖而力以為請夫一官而可使一方
平治以無煩當宁之憂何為而久吝此災傷疊
見饑饉洊臻閭里蕭條供輸匱竭今又黃河橫

溢夫役繁苦瘟癘盛行死枕籍而奸狡亡命
之徒所在蟻聚假以左道妖詞謀為不軌如廖
萬賈恒李許李大榮詹希楚等聚衆五六千人
聲勢重大臣等習聞之而臣鯉尤係本貫人氏
知之極真每念及此即顰蹙而涕泣者也鯉得
家書言有親弟染疫而亡可見天災流行不虛
地方受害已極夫彈壓于未發之前易征勦于
已發之後難諒吏部屢推堪為巡撫者已有七
人皆當今才望之臣惟 俯命一人前往料理

使中州百萬生靈脫于水火之中實社稷之福
今將吏部會推各官開具于後

張鳴岡

顧雲程

耿定力

李堯民

許弘綱

王守素

趙士登

七月初
九日

辨湯御史本并乞休疏

奏為留賢反召人疑謹明心事仍求退休懇乞
早放歸山以全晚節事臣惟朝臣徃徃好訟始
于自相攻擊而終于牽連閣臣昨接御史湯兆
京一揭為總憲頓挫已極輔臣心事未明懇乞
聖明放歸以全紀綱事內言給事中鍾北斗之
叅都御史溫純為有涉元輔冒嫌排擊上雖再
留純而降諭之際尚非溫旨元輔雖有留揭而
辭氣之間未化成心又言畫南北于一廷之上

修睦眦于白首之交故示羈縻待其委頓無聊
銷藩以去而令天下謂皇上實棄之又言純
未勅二臣時元輔已引疾不出幕中豈無先入
哉北京所以疑臣心事未明者此其大指矣按
心事未明四字臣揭中有之北京斷章取義驚
人耳目善攝文者不宜如是移理就情豈謂忠
益誠愛純者亦不宜如是誠為純解紛者亦不
宜如是必如其言臣將為名教罪人矣敢無一
言以自白乎臣聞人臣惟君命是尊語曰君命

召不俟駕而行雖有辭讓之節讓不過三心如
皎日何必遲回却顧屢上封章以要無已之後
命而適貽再三瀆之後悔人臣而奉有絲綸一
字榮矣已得溫旨而尚嫌不溫非禮也北京于
是乎失言矣原純本意殆不其然北京其陷純
于不義哉其謂臣成心未化豈以臣之揭留純
也尚未盡善乎密勿之言外廷何由知臣之言
可以入告亦可以公言于朝言止于此心亦止
于此請公言之臣之揭曰純之為人誠實忠藎

臣數年與之共事無非愛君憂國之語心實重之偶以一疏未當而久致逡巡臣若不言天下之不知者將以為純之前疏有涉于臣而臣之褊心不能忘情妨賢之誚安能逃之乞將純今疏批發勉令視事以振憲紀以飭計事庶臣心事得以少明其言如此臣自謂曲盡矣祇有一疏未當四字不能掩其瑕耳不掩其瑕乃顯其瑜而北京以為臣成心未化人之度量豈不遠哉試問二輔試問九列此一瑕也為可掩乎不

可掩乎必欲盡掩其瑕而曲彰其瑜此市廛售物之心非大臣入告之道事君者勿欺為先好而知其惡惡而知其美誠心直道是為勿欺

皇上聰明天縱二三大臣人品心術何不洞鑒此事之曲直是非又何不洞鑒而臣敢欺乎哉臣與純白首一廷驩然無間忽于臣四五乞身之時為無端倡疑之舉北京所謂朝議疑之者衆是也當此之時朝議盡疑而臣心不疑為之五次擬旨三次具揭以留之謂臣有成心未化

可乎必謂純之疏為當則皇上已有曲直未

分之旨而此旨又非臣所擬也臣家無雜賓門
可羅雀筋力已盡常思避賢若有入幕之賓必
不樂臣求去臣可屢疏求去正以門無幕賓臣
既辭官則一切閣事盡數交代何分乎南北何
修乎睚眦而留此一蹊蹠事以增去後之累此
亦足以察臣心矣凡北京所以規臣者臣敢不
自省獨痛夫臣以留揭明心而北京更乃借是
以昧臣心耳三揭五票具在御前望皇上取

而覽之近日尚有秉憲肅紀輿望所歸之語比
之揭語尤為盡善北京所謂頓挫之羈縻之銷
繭之者安在非皇上不能為臣雪此寃此臣
之所以禱祈席藁而俟命也論臣本意則臣之
與純非相違也而相從也嘗以為安定國家必
大焉先誠欲與純安詳審固傾身下人以和朝
士以定國家而茲不能矣始願既乖惟有一去
輒敢再申前懇伏乞憐臣千辛萬苦之餘生所
存無幾特賜骸骨俾就隴土生環死草誓不忘

報

七月二十二日奉

聖旨卿純忠體國開誠布公朕素所鑒知都御史
溫純卿屢揭必稱其賢每票必擬勉留具見雅度
安有成心且大臣去留出朕獨斷純自固辭與卿
何預卿宜自信不移即出輔理以定群囂慎勿再
辭今後言官務要平心詳審當於本情不許故為
猜疑淆亂國是吏部知道

·
原缺

萬壽請受賀揭帖

三臣題恭惟本月十七日復當我皇上萬壽
聖節之期四方之吏賁表而雲馳重譯之夷捧
琛而麇至填庭溢闕皆願望見天顏以伸頌
祝之忱頃歲以來槩蒙傳免去年乃命于午門
前行禮拜舞成行臣子雖獲少盡而翠華隔于
雲霄非所以昭盛美也况冕旒御宇于今為三
十年虹電流輝于今復四十載覃深仁于必世
已觀久道之成介壽履于維祺方見卜年之永

臣民喜躍更倍往時伏望 皇上今年于文華
殿臨朝受賀以聆萬國之歡呼以介萬年之景
福若以階墀狹窄不妨列班文華門外但得一
瞻天表如太陽升天容光畢照曲竇之下亦皆
奮起也臣一貫比塵首揆阻奉清光積戀經時
同于饑渴臣鯉臣賡違侍十年來從萬里未承
聲欵尤切瞻依惟 皇上乘呼嵩祝華之時復
臨御登延之舊精神與臣庶往來體脉自然流
貫仁恩將海寓周浹祿壽自爾蕃滋至臣等不

有回道御史不差故以試御史瀆擾市恩因以留
中屢本未發於卿何預今又致生猜疑紛紛瀆奏
殊非政體方今國家多事卿宜仰體朕眷任薦隆
繹思君臣大義毋以浮議介懷即入贊襄弼成化
理慎勿固辭吏部知道

矣即未復其官可不亟全其生乎昔漢時楊彪
下獄滿寵謂此人有名于海內若罪之不明必
失民望遂赦出之今建繫諸臣皆皇上之所
拔擢亦有一日微名久幽圉圉失民之望又何
如外人皆謂皇上未嘗不知諸臣無罪特慮
稅事阻撓姑繫之耳果如人言則今此稅事有
誰阻撓而久繫諸臣何關於輕重惟早行放釋
則昭好生之至仁增履祥之弘慶豈非今日一
美聖政哉查得諸臣前有知縣王之翰通判吳

應鴻陳奇可驛丞周應麒生員孟希孔等既斃
于獄近日知縣王正志守備王煬相繼又斃道
路悲之如悲親戚縉紳之流尤興狐兔之感悲
感不已則於鴻名盛烈不能無損臣等職司輔
德意在尊君款款愚忠不能自遏而臣一貫親
奉面諭未克奉行人之罪臣尤為迫切伏望明
示 聖意特令曲全其餘囚犯并付法司擬議
奏處則肆赦者沐德創艾者畏威培養壽源而
保安國脉非淺淺也

八月二十
一日上

乞休三疏

奏為病苦難支三懇天恩俯賜允休以畢臣分
事臣以庸愚備員輔弼調燮罔效致召人疑再
疏自明因求去位駢蒙 慈憫特為臣闡發
聖意釋疑解紛是時有御史康丕揚亦同前意
臣不復辨惟是積勞之病愈深求去之意尚鬱
恭遇 萬壽聖節未敢瀆尊伏念臣本無技能
第有遭際懷報恩之心而無報恩之具故筭效
計功恩益崇而報益誦而臣之為心非惜然無

覺者內不能不驚于夢寐外不能不惕于人言
強索其所不明痛鞭其所不繼則無益于國
之毫末而有傷其身之丘山矣故精神日敝于
一日筋力朝衰于一朝以今歲比昨歲如秋水
涸盡可立竢不但以手約腰有量減分寸之可
言也舊年屢䟽乞身原出本意後因有聞不得
不强出調和而一歲于茲不能調和而反滋紛
擾臣之精神喪盡靡所建豎效亦可覩見積此
不已於身於國皆成損失益滋罪戾伏乞悲憫

終賜大惠聽其乞骸僅得一致仕之名實永世

無窮之感

八月二十二日
上二十五日奉

聖旨卿昨請假數日朕以攝調為重特為勉從今
如何又有此奏且卿德望更有精力正需弘濟艱
難方切倚毗豈得固言求去宜即出贊政無勞朕
懷吏部知道

乞休四疏

奏為無用病臣四懇 聖慈早賜歸骨以終恩
造事臣以病苦莫支三疏求去伏奉 聖旨卿
昨請假數日朕以調攝為重特為勉從今如何
又有此奏且卿德望更有精力正需弘濟艱難
方切倚毗豈得固言求去宜即出贊政無勞朕
懷吏部知道欽此疊荷溫綸悲感交集使臣未
至極憊稍可勉承隆知莫酬頂踵何惜顧勲嘸
之疾并時大發如駭機激電莫知從來壞坊奔

濤無可禁過涕泗被面氣溢填胞胃閉不開飲食妨少漸至肌骨銷解形神潰離手足痺麻艱于運動未寒而顫不灼而呻蓋年徃病來福傾災入理有固然何可逃也臣居常深念賦性慤愚久試無可何忍固求引退但天地不能全傾覆之物父母不能厚窮竒之子因材而薦總屬至仁既壞之器宜置隱所戀恩不去終成負恩誤身已矣誤國謂何伏望 聖慈哀憐與一致仕以養衰疾萬一未填溝壑猶堪歌詠太平實

緣久哀欲成素志始終造命仰賴

聖明

九月
初四

日
上
初
五
日
奏

聖旨卿攝調已久前曾有諭勿勞朕懷何忍又為此奏平章事重首輔更急便着鴻臚寺堂上官往宣朕意時下即出贊理慎勿再辭吏部知道

乞休五疏

奏為年衰力盡勢難復留五懇 聖慈俯允休
致以全君臣大義事頃臣以老病交劇四懇乞
歸荷蒙 聖眷朝上夕報不移晷刻而需恩勉
留復責以平章之重事促以臚句之傳宣苟有
肺腸能無戀慕 皇上以忍字激臣臣誠有所
不忍也顧念出處一關所係甚大與其誤國寧
若引身欲不負恩當無失已自昔人臣之誤國
負恩者祇緣末路之棲遲而喪平生之堅立其

于此關有未透耳臣筮仕三十六年立朝日久
每蒙駢恩疊賜踰躐如不敢當則素服止足之
庭訓故也屏絕私交一意奉主又恐蹈係遯之
厲而去位之日不得脫然故也論臣之志如史
鮪陳尸亦所不惜論臣之力如疏廣乞骸已甚
後時銷鑠交加金石未免挺解風霜飽歷松柏
亦且凋殘似臣多病侵尋豈能久在人世即使
辭榮就寂不過再延數年丐此餘命為盛世一
閑人惟 皇上哀而許之蓋馬力已竭而驅之

不已則敗蹶可虞車軸將折而駕之不休則傾
覆為患臣自量甚審將逃嚴誅非敢負恩負國
也伏叩矜憐聽臣致仕更望少輟萬幾親賜裁
決若發閣票擬則二臣必不肯相成而臣竟無
以明進退之義矣惟哀而許之

九月十二日
上十三日奉

聖旨朕為社稷留賢遣官宣諭延佇可知卿自宜
仰念腹心倡百僚以君臣大義乃先諄諄言去於
義謂何既稱夙服庭訓豈其不及于此朕必不從
卿所請無用屢疏為勞吏部知道

原缺

明為華越道地也前後覆本並無一字少傷華
越而於楚王則欲其避位聽勘令別宗代理國
事明是曲護華越而陰偏楚王之死也會議諸
臣有長篇為楚王訟寃皆匿不聞肺肝顯然畢
見矣及聞科道有言恐言者繼至無以自解遂
出此一着以鈴人口夫已則行私而誣臣以私
已則蔽匿而誣臣以匿冠裳文物之士乃亦為
此乎可為世道長太息矣臣之薄德尚不能聯
屬詞林甚愧于心 皇上自有聖鑒天下自有

公評臣何必多言連疏乞休正殷瞻睇惟乞
早賜乾斷亟許還山以全不肖之微軀而昭

聖主終始保全之大德

九月十四日
上十七日奉

聖旨卿贊政多年公忠廉慎朕所鑒知楚府事情
歷來發旨朕俱傳示與卿何干乃被猜疑誣詆至
此卿可不辯自明覽奏更益昭白所念輔弼首臣
巖瞻重望包荒藏納素性已然其尚時下即出勿
以浮言介意吏部知道

停刑揭帖

三臣題臣等觀魏臣桓範論世道升降之會率以德刑多少為差目德所當尚而刑所宜緩也我皇上寬仁在宥十一年于茲深仁厚德所以培萬萬歲無疆之壽而綿萬萬年無疆之歷者邇越千古矣乃今又逢決囚之期臣等竊有所請蓋今年災異屢見其他未論即鳳陽祖陵有風雷雨雹毀廟拔樹之災皇上惕然深省慮驚在天聖靈於是特遣鎮遠侯顧大

禮恭詣祭告以伸奉慰且令百官共加修省無
事彌文至仁孝也臣等碌碌無能奉行萬一竊
惟和氣盛則蒸而為祥殺氣多則鬱而為沴近
自東征西討殺伐過多修省之實惟在恩撫德
可勝妖仁可致祥敢為 聖明顙之況今兩宮
美成臨御在即 福王婚禮亦將舉行皆國家
吉祥善事中外人心咸望再停一年以彰好生
之德以迎滋至之禧盖停刑與肆赦不同肆赦
則法廢而為奸民之資故不欲其數停刑則法

在而為仁政之助故不厭其數易稱議獄緩死
書稱惟刑之恤正是此意伏祈嘉納霽渙明命
以慰中外之心

九月二十六日上

乞休七疏

奏為七懇天恩俯賜歸休以全分誼終始事臣
惟人臣事君非始事之難而終事之難昔之罔
終者皆不自量而妄以不肖之身久從事故也
伏念臣十年直閣五載獨處栖遑遑景為孤
立幸遇 皇上主張于上凡所以教誨提携者
無不周至獲有依憑以至于今然勞怨之所獨
擔者不少則今日而被譏評之及晚矣尚賴俯
垂照鑒曲賜保全不然后臣一介朽枯耳摧拉何

足道哉臣既已傷弓誠宜遠引倦飛知還日切
投林之想驚棲不定又增集枯之危展布彌艱
孤負當甚敢垂尚未見厭冒申前請伏乞大開
天慈悲憐臣意容臣休致以禮終始臣如苟活
當歌詠太平若即永捐亦營圖環草

十月十八日
上初十

日
奉

聖旨前已宣諭朕意望卿早出何又求去不已卿
為元輔獨擔國家重任不避勞怨違恤譏評朕心
甚明公論難泯何驚何危試觀今時可是卿恣然

遠罪之日否其益堅信此心亟出贊理以全大
忠大義雖進百牘朕必不從卿宜念之吏部知
道

辨妖書并乞歸䟽

奏為飛謗流行掩蔽 聖德動搖 國本懇乞

嚴加訪拏以明法紀并祈早賜放歸以保殘喘
事昨同官朱賡獲有謗書一冊計紙四張名為
國本攸關又名為續憂危疏議計五六百言皆
臣子所不忍見之詞臣不覺髮上指冠也臣惟
冊立 皇太子及冊封諸王一事 皇上暢天
性之真愛定社稷之永圖長幼之倫秩然有序
首建元良萬邦以貞臣瞻睇有年而遭逢一旦

正與四海九州慶主鬯之有人釋杞漆之深憂也臣如更有觀望犬彘不若寧人類乎彼為鬼蜮者乃駕捏虛言無踪生影至于混淆庭闈宮禁之情離間父子骨肉之愛掩抑皇貴妃贊成之盛德點染福王孝弟之令名誣陷大小臣工坐以翻天覆地之罪而尤首齟齬臣豈但尋常排逐將令闔門寸斬臣于斯人非有不共戴天之仇何為致此且其所言王道化一事查得王道化曾拏犯人李三謙尚在詔獄刑部無名郎

原缺

聖諭嚴捕妖犯回奏揭帖

二臣題昨日文書官劉用恭捧聖諭至臣等

私寓諭內閣朕自承繼祖宗垂統每思太

子乃國根本朕心慈愛教訓皇太子聰明孝友
純篤其諸皇子俱各好學賢良時率謁見聖

母喜悅倍增且皇后皇貴妃俱常好善修齋敬

慎侍奉朕心忻慰可謂國家具慶矣近見皇太

子成婚已逾二年未見子嗣心切念慮已面諭

慎擇淑媛內助以廣後出螽斯又時逢陽長適

遇聖母萬壽節朕心歡悅正欲特諭卿等條
具祈天永命保國安民事宜詳擇施行共圖化
理不意昨東廠訪獲奸書一本具奏事件朕一
見怒恨何嘗有此意念着密訪真實奏來重加
究治今日覽文書見有卿等所奏及印刊奸書
相同何乃駕捏虛言無踪生影混淆庭闈宮禁
離間父子兄弟親情誣陷大小臣工坐以翻天
覆地之罪而首傾卿等一網打盡忠良使朕孤
立于上蓄謀叵測朕心愈加忿懣必有主使之

人同謀黨類卿等可傳示便著廠衛城捕緝事
衙門嚴行訪拏在外即行各撫按等官緝拏俱
要真實具奏務在得獲以絕禍源以昭天理國
法卿等為朕股肱義同休戚豈宜辭避墮中奸
計驚危宗廟社稷卿等可即出贊理以分朕
憂以鎮奸心特諭卿等知之欽此臣等焚香跪
誦不覺感激涕流伏地而不能起也仰惟皇
上至大至公盡倫盡制建元良以定國本分藩
輔以固宗支天性懃惓人彛秩敘皇太子與

諸皇子孝友純至兄弟既自怡怡 中宮與

皇貴妃敬慎無違宮闈又皆穆穆 皇上集諸

景福奉 聖母萬萬年之觴嘉禮歲修孫祥可

待此真國家之具慶修齊之大徵也臣等幸佐

下風方與大小臣工頌禱高厚何物神奸乃敢

鑿空造釁煽作妖言竊詳其情似出小輩相傾

之詭謀然據其事實犯無將不可追之大戒睽

離 皇上父子之恩釁萌 太子 福王兄弟

之愛構 宗社艱危之隙釀臣工轉礫之誅青

天白日之中條見魍魎之象臣等怒髮衝冠恨
不即得其人而寸斬之又復自恨不能肅清政
幾而令此輩恣肆佐理無狀不容不引身以謝
天下也荷蒙 皇上奮赫威怒肅昭紀綱勅諸
緝訪之司必期罪人之得手書聖鑒顯諭臣等
譬之震雷發聲狂妖自攝太陽朗照邪魅必消
忝在股肱義同休戚敢不絕私為公以身討賊
何能固守匹夫之節不仰分 皇上之憂也即
已發科傳部轉示嚴衛城捕緝事衙門并行在

外撫按等官嚴加訪拏務期得獲其祈天永命
保國安民事宜容臣等次第條具惟 聖明俯
擇施行原奉 聖諭謹尊藏閣中昭 皇上惇

倫聖讒之美謹具回奏

十一月十六日
上十七日奉

聖旨朕覽卿等所奏具見同心一體君臣大義連
日怒氣弗息必得真實奸惡以昭國法方慰朕心
諭卿等知

請宣諭 皇太子揭帖

三臣題蒙發鄭國賢一本臣等恭繹 聖意擬
票候裁臣等竊思此謗必出臣下相傾之詭計
特假借國本為詞耳既已借詞關係宮禁 皇
上聖德及 皇貴妃本心固天清日朗絕無纖
疑但恐 皇太子乍聞此事不無驚懼臣等竊
思似宜特宣面諭以安慰之或奏聞 聖母轉
諭以安慰之庶父子天性至恩歡欣流通國本
從此益固家慶由此益厚 宗社幸甚臣等幸

甚一得之愚伏乞

聖明采擇

十一月十八日上

命作諭 皇太子并諭局郎等進呈揭帖

三臣題昨諛臣等奏揭請 皇上將近日奸書

之事面諭 皇太子以安慰之隨蒙 手批朕

覽卿等奏揭恐皇太子乍聞驚懼特宣面諭以

安慰之忠愛篤至正合朕心但此事關係重大

莫比家庭常訓不必奏聞 聖母恐動 聖心

卿等議擬一諭安慰教訓朕面賜之其本宮內

外局郎執事人等亦當戒諭一旨一同擬來諭

卿等知欽此臣等莊誦綸音不勝忻服仰惟

皇上天親至愛纖悉周詳既欲諭之以安其驚懼之心又欲訓之以迪夫義方之教至於本宮內外局郎執事之人亦皆嚴加戒諭使於出入起居之間罔非保獲扶持之益又臣等想念所不及而聖慮淵衷之獨到者也臣等謹導

旨撰擬二道惟是才疏識淺不足以發揚聖

意伏乞皇上改潤施行

十一月十九日奉
二十日奉

御批朕覽卿等所奏體悉周詳具見忠愛懇切已知道了

擬諭二道

諭皇太子朕身任綱常敦篤倫理矧父子骨肉之間天性至親豈不尤切昨年朕思祖宗統緒至重宜建國本念汝聰明賢睿孝友恭儉為吾元子天敘久定恭稟聖母慈訓上告天地社稷宗廟冊立為皇太子因封汝諸弟為藩王大小有倫先後有次明詔萬方咸俾知悉朕之此舉自謂佑啟我後人咸以正無缺矣兩年于茲方深慶快何意忽有畜物構造奸書離間

我家父子兄弟之情因詆誣及中外大小忠良之臣朕一見之怒恨交集虛上駕虛影外生影夢想不到之妖妄天地不容之奸賊罪大惡極不可原赦已著嚴衛城捕及在外撫按等官大懸賞格嚴行訪拿旦晚可以必得矣特念汝素懷敬慎篤于孝友乍聞此事恐致驚惶儻致眠食少妨使我滋多懸掛今特宣汝面諭又思此事關係重大不比家庭常訓可以數言而了況吾意憤氣激尤難具言特降此札以著委曲朕

思此謗必起于臣僚之自相傾陷假借國事以
為名耳雖在臣僚亦無一毫指實矧吾宮禁而
可為彼簧惑但恨此賊將朕一腔慈愛真懇之
心掩關不著即皇貴妃平日好善敬畏之意亦
為所掩汝至明睿知今達古細繹吾言深惟此
理宮庭肅穆名分秩然綱常倫理毫不可易毋
因奸偽以致驚疑今吾此諭一以安慰汝一以
教訓汝大學有言其為父子兄弟足法而後民
法之周易亦云父父子兄兄弟弟夫夫婦婦

而家道正正家而天下定矣汝其勉之敬奉吾
言為天地社稷宗廟慎重自愛故諭

皇帝戒諭皇太子宫中內外局郎執事人等知道
近日京師偶有奸書流傳關係國本朕知此書
必是奸臣傾陷忠良假借宮禁為此妖妄絕無
一毫影嚮之事恐皇太子過為疑懼朕已有諭
旨了爾等宜以理開導使安心進修以保睿體
以進睿德毋得妄相誣惑離間宮闈誘引非禮
之事如違法典具在治罪不恕

二十日奉 旨 諭進十
二月初五日 諭太子

催請諭 皇太子揭帖

三臣題奸書一事連日殿衛緝拏雖得其似尚未盡真 聖心焦勞臣等何能頃刻 皇上貽謀盡善盡美倏此無根生謗固可痛恨然因循大闡 聖心發揮天性亦今日事機不可已者昨命撰諭 太子勅及戒諭 太子宫中人等勅已經寫奏但原 諭面賜則 皇上必有諄諄訓詞臣等職叨輔弼誼切股肱當請侍班預聞盛典儻 皇上靜攝之時不敢必諧所願乞

於某日某宮面見面諭既畢之後特命左右記其詳悉發示閣中俾流傳外廷以昭天下付之史館以垂萬世尤無疆之令聞不朽之宏業皇太子益有所遵循而宮闈父子兄弟之間藹然和氣周洽流通今之至美事也臣等又惟聖諭謂不必奏聞聖母恐動聖心皇上至孝寧親不勝欣誦但此事必當奏聞尤須委曲詳盡不徐不激皇上自有愉色婉容不待臣等陳說臣等中心懸覬不能不進一言也若

夫廣宣德意明飭國法必得罪人以絕浮謗則
臣等職分敢不竭力謹具題知十一月二十七日奉
御批朕覽卿等奏揭具見忠愛懇切已知道了

再票錢夢臯本揭帖

二臣題蒙發給事中錢夢臯本傳諭出旨竊惟
此本昨夜已經票上今蒙再發臣等愚昧不當
聖意但本內關係次輔臣下擬票止可如此萬
死不敢冒嫌增罪 皇上至聖至明而輔臣進
退惟上敢乞速賜親斷不然則在廷紛紛又兢
起戈矛而益勞 聖慮矣臣等各負斧鑕以俟

謹具奏

知 十二月二十八日上

看詳皦生光詩稿揭帖

二臣題蒙發逆犯皦生光所作岍遊稿并卧榻
傍帖一紙臣等看詳本犯頗有小才然不純正
操妄叫噪工于扭捏可見非端雅之士內屢稱
大冤大讎蓋因詐騙致罪而不知自省悔但尤
他人也空詞繁言無足推求事實惟誣訟一首
內有君父塵喉舌庶欲惑國本及皇運恒安流
三句似有關係然亦含糊難明惟 聖明洞鑒
謹茲題復并原書及帖上進

十一月二十九日上

親諭皇太子傳示到閣奉慰揭帖

題司禮監太監田義陳矩成敬到閣具言今日
皇上有命着司禮監太監田義等送太子到本
宮畢就都親到內閣口傳與先生每知今日我
親朝 聖母回宮就宣皇太子在啟祥宮前殿
親賜皇太子慰旨及戒諭內外執事局郎等官
聖旨面諭皇太子云我的慈愛教訓天性之心
你是知道你的純誠孝友好善的心我平日盡
知近有逆惡捏造奸書離間我父子兄弟天性

親親動搖天下已有嚴旨緝拏以正國法我思
念你恐有驚懼動心我著閣臣擬寫慰旨安慰
教訓你又有戒諭內外執事人等旨意今日宣
你來面賜與你我還有許多言語因此忿怒動
火難以盡言我親筆寫的面諭一本賜你細加
看誦則知我之心也到宮安心調養用心讀書
寫字母聽小人引誘傳時淚下皇太子亦含淚
叩頭請去送至殿簷隨賜膳品四盒手盒四副
酒四瓶口傳與先生每知欽此臣等恭聆傳示

莫不感泣仰誦 皇上此舉真止孝止慈盡善
盡美天性由衷之愛聖人人倫之至宗廟神祇
亦當昭歆天下萬世靡不傳誦在 皇太子奉
此及疑畏盡釋孝友益敦進修可以日躋睿德
因而日長在宮闈奉此則兄弟既翕和樂且耽
愛敬為之益勤埶麓大相歡洽合宮中之和氣
以承 聖母之歡心則所謂貽厥孫謀以燕翼
子者又在于是且由宮中之和宣為朝廷之和
為天下之和臣等下風感受恩庇 聖心不免

于憂勤 聖德大光于天地伏望茂攝起居以
迎景福少簡煩慮保合天和所有恭奉傳示詳
委并宣諭 皇太子文戒諭 皇太子宫中文
臣等播之在廷以示天下付之史館以垂萬世

謹具題知

十二月初五日
上初六日奉

御批朕覽卿等奏揭具見忠愛懇切今日此舉先
奏聞 聖母後面諭皇太子及傳示於卿等乃曩
倫攸敘君君臣臣父父子子兄弟兄弟誠卿等所
謂一宮中咸在和氣中美保全天和朕知道了

福王納徵遣官揭帖

二臣題福王妃納徵例遣次輔行禮今臣鯉給假蒙發票擬臣一貫臣賡惟皇上命不敢定

擬謹具請

旨

十二月初五日

又

二臣題十三日冊福王妃臣沈鯉給假具奏臣一貫臣賡恭候欽遣捧冊行禮未蒙定發不勝瞻跂惟望早賜簡命庶便齋沐將事謹題請

旨

十一日

請寬李家宰等差錯揭帖

二臣題竊詳尚書李戴認罪本錯中增錯亦復何辭但此小失似難深罪大臣有旨責問亦足示懲矣其人素性忠謹近又患病臣等亦不忍苛責也至于考功司官正當大察之時封鎖看冊是真實語又難移罪于彼司官若在必不有此失錯明係寫本用印各役之罪法不可宥臣等參詳擬票伏乞俯鑒允行

初九日上

請寬計賊引咎自陳疏

二臣奏為討賊未效奉 諭增悚自陳不職伏
俟 譴罰并陳討賊事宜以希 聖鑒事項自
奸書流行奸人未獲上千霆怒日命推求錦衣
衛接出 聖諭大小臣工莫不凜凜錯愕而會
議諸臣奉 命姑且都饒這遭於十一日報名
廷謝臣等雖不預會議而備員輔弼罰宜首加
何得以諭旨未及輒圖苟免按此諭初九日晚
發而是日廷臣正在會問心力交盡 皇上未

之前聞也然仰見聖心討賊之急而廷臣先領此意矣獄情微曖原自難知緩之固恐逋奸一急之亦恐失實獨念此書原為傾陷臣等臣等身居禁林出入綸命地既危地機又危機所以感事傷心而不得已於言也生平所學耻言刑名雖當聖明赫怒之日必不敢因緣為操切之政輒以一言贅瀆夫此書事關于國本情起于私仇惟國本宜坐大逆之誅惟起私仇當有未減之議如得造意魁首以正國法似亦是

矣其家人妻子及刊刻流布諸人不論知情不知情皆在可議不可與大逆等論又况交游知識可株連乎此獄情之所當申議者也臣等指誓天日毫不敢私苟有毫私雷霆下擊嘗語王之楨言奸賊本意害人而托之于國本致興大孽可謂至愚儻借此獄以快私仇與奸賊何異彼犯一事一款者自有正條不可羅織上報

聖主中服縉紳下示天下萬世且關係身家不小問成之後尚送東廠覆問會官再問戒之戒

之矢慎矢公此臣等之所惓惓者也惟願 皇
上臨之以天地之公照之以日月之明一聽在
廷公論而折衷以理今日論定則萬世論定宮
闈天性之親藹然和氣流浹無窮而縉紳士庶
亦不至偏有所傷共享大和餘澤矣惟是諸臣
皆蒙切責臣等尤宜首譴謹席藁俯伏以俟

嚴命臣等無任悚息之至

十二月十三日上

聖旨覽卿等奏見為國忠悃慎重刑獄至意朕已
具悉俟廠衛鞫審明確府部九卿科道等官會議

具奏朕當斟酌情務求至當折衷以理必不枉縱
卿等為朕分憂心力俱竭朕方嘉念不已何必引
咎自陳墮賊奸計宜時下即出贊朕裁決以昭明
允之治吏部知道

請趙司徒署吏部揭帖

三臣題近該吏部尚書李戴致仕該部題請署
印官臣等擬戶部尚書趙世卿暫署蓋前此楊
俊民為戶部尚書亦嘗署吏部印有故事也今
本部新點左侍郎楊時喬遠在南京右侍郎周
應賓以詞臣一旦被命未經練達適當大察有
難直任故臣等以為非別部尚書不可惟聖
明早允目下欲推本部尚書緣無署印故緩又
有推陞大選等事亦閣不行仰首望命惟乞

早賜批發

八日十月上

原缺

又臣惓惓之忠也臣無能報主憂不進賢天日
照臨絕無一毫市恩營私之意誠念國家太平
遠計惟在于此望皇上俯納緣係密請謹以
手書潦草題知

十二月十八日上

請設楚宗正揭帖

三臣題蒙發刑部覆錦衣衛橫宗抗旨入都
投揭復行誣害等事一本內叅通山王府輔國
將軍蘊鐸等合照例革爵仍行撫按與華越等
一併勘明議處除臣等票擬外竊思楚事屢歷
聖明處分至精至當而尚有橫宗誣害不已者
蓋楚俗輕剽好訟而群宗尤恣肆難制楚王破
辱法令不行撫按有司又不敢問難之未靖其
源在此臣等竊思今江西河南王府皆設有宗

正一官故能修明宗範繩以禮法此制甚善臣
等敢於今 旨中帶出此意令該部擬議妥當
奏請允行庶為安楚之一助也臣等不敢擅便
惟 聖明定奪

十二月十九日上

原缺

庭尤著矣似亦不必追至妻妾子女也古者罪人不孥臣等敢為諸婦女請命諒非漏網謹擬

票上請

聖裁施行

十一月十九日上

發沈令譽事者勿與問揭帖

蒙發錦衣衛問過犯人沈令譽等一本到閣擬
票看得此本奉有前旨宜票會同該科及原
題御史再行研審得情之後送廠再審但臣等
昨在朝房有該科都給事中楊應文給事中錢
夢臯御史康丕揚來見稱說沈令譽等犯人干
係侍郎郭正域乃彼三人之所叅發今預此獄
寬之人必疑為縱奸急之人必疑為修怨不若
付于事外之人始為虛心詳慎錦衣衛之題本

欲明至公三人若預亦何以明至公懇臣等轉
聞政命臣等頗然其言茲敢兩票以上一照初
九日 聖諭竟送廠審一擬發刑部令其研審
得情送廠再審以後皆待府部九卿科道等官
會審未敢擅便伏祈 聖裁

十二月二十一日上